



PESERTA mengayuh basikal pada Program Kuala Pilah Fun Ride di Kuala Pilah, semalam.

Makan angin santai

Oleh Amran Yahya
am@hmetro.com.my

Cuaca baik beri peluang 750 peserta Kuala Pilah Fun Ride berkayuh promosi destinasi pelancongan

Kuala Pilah

Cuaca baik tanpa jerebu memberi peluang kepada lebih 750 peserta Program Kuala Pilah Fun Ride berkayuh menikmati keindahan dan kawasan pelancongan menarik sekitar daerah ini, semalam.

Pengurus Lembaga Pelancongan Negeri Sembilan, Mohd Afif Anuar berkata, program itu pengisian bagi menyemarakkan sambutan sempena Minggu Inovasi peringkat negeri di daerah ini.

“Sejak negara dilanda jerebu, kami bimbang program ini dibatalkan seperti yang berlaku di beberapa lokasi lain sebelum ini apabila indeks pencemaran udara

(IPU) pada paras tidak sihat.

“Namun cuaca hari ini (semalam) cerah tanpa jerebu dan ini memberi semangat kepada peserta kayuhan yang hadir,” katanya di Kompleks Rakan Muda Kuala Pilah di sini, semalam.

Bermula jam 7.30 pagi, pelepasan kayuhan disempurnakan Timbalan Setiausaha Kerajaan Negeri Sembilan (Pengurusan), Masri Razali dan turut dihadiri Setiausaha Kerajaan Negeri Sembilan, Datuk Dr Razali Ab Malik serta Pegawai

Daerah Kuala Pilah, Syahrul Nizam Saleh.

Mohd Afif berkata, biarpun kayuhan itu tidak menawarkan hadiah, ia tetap menarik minat semua golongan berusia daripada tujuh hingga 72 tahun.

Syahrul Nizam berkata, laluan dipilih mempromosikan beberapa kawasan menarik di daerah ini sesuai objektif utama penganjuran program berkenaan.

“Sebanyak 80 peratus laluan meliputi kawasan hijau termasuk ladang, kebun sayur serta hutan bermula da-

ri Kompleks Rakan Muda, peserta kayuhan dibawa melalui Jalan Melang menuju ke Bandar Diraja Seri Menanti.

“Peserta dapat melihat keindahan seni bina Muzeum Diraja Seri Menanti yang mana ada dalam kalangan peserta belum pernah sampai ke sini, selain destinasi lain seperti Kelab Golf Diraja Seri Menanti serta Tasik Londa Naga yang sering menjadi tumpuan pengunjung.

“Ketika menuju ke Senaling, peserta melalui perkampungan tradisional Melayu yang bukan saja menggamit kenangan, sebaliknya menyajikan suasana yang mendamaikan,” katanya.

Program sempena
sambutan
Minggu Inovasi
peringkat negeri